

## ATSHENA KA UTAUIKAT ISHKUEU

Etuat Rich

Pepamutet ne innu, ekue taushkakut nete Atshena tshek, ekue nipaikut. Ekue ashetatikut nenu ka ututet, uapataminiti uitsha tshemateniti tapue. Tshenakakuneshinniti, ekue ishpatashit ne auass anite tshipishkuat. Uet nutenak ne Atshen. Ekue ashapaniut ne auass tanite kushtashinueu nenu eshinakushiniti. Ek<sup>u</sup> ne ishkueu nasht kuetu iteu nenua shiatshuapiniti ekue ishinikatat « nuta » natamik<sup>u</sup> enuet.

— Nuta, iteu, ka-tshikushtikushua nitanish.

— Eshe, iteu ne Atshen (tanite nasht mushekapaunua uipita), tanite nasht apu minunakushian, nipa tshi a eka kushtik<sup>u</sup> ?

Tshessenimat eka ua nipaikut, enuet tshika pitutetishaeu.

— Nuta pitutshe, iteu.

Ekue pitutshet ne Atshen. Takuneshu nenua utauassimisha ne ishkueu. Mishta-shuenimeu tshek eshpish uitshimat anite ne Atshen, mishta-shuenimeshu nenua ishkueua eshpish uitshimat. Ek<sup>u</sup> utineshu nenua mani ussimisha. Ek<sup>u</sup> tshimut ui nipaieu mani nenua auassa, ushkat anite. Ek<sup>u</sup> ua tshissenati, ek<sup>u</sup> mianiti nenua auassa, kau ekue patshinat mani. Ui tshisseneshu nenua tshimut, ek<sup>u</sup> mianiti kanapua mani, ekue utinaniti mani utanishinua. Tshek ma mishta-shuenimeu, mishta-shatshieu tshek eshpish uitshimat nenua.

— Ek<sup>u</sup> nuta, kuetu matshian, etikut mani.

— Nika natuapaten nitanish tshe mitshin, ekue itat mani.

Ashetame takushinu netutikuet. Peik<sup>u</sup> atikua petshinikatueu mani. Peik<sup>u</sup> atikua peshueu mani netutikueti, nanikutini nish<sup>u</sup> peshueu mani. Unikataueu, apu ui utapet.

— Nitinish, iteu, tshika utitik<sup>u</sup> Atshen, tshika utitikunan Atshen, petuteu. Tshipa umishtikumikun nitanish, nimishtikum tshipa tuten.

— Tan eshpitashkuak ? iteu ne ishkuueu.

— Minaik<sup>u</sup> nutim peik<sup>u</sup>, itiku, e tshinuashkushit, muk<sup>u</sup> apishish tshika tshitshikatueuau nete.

— Eshe, iteu.

Uauitsheueshu nenua mani utauassimisha (apishissishinua tanite). Ek<sup>u</sup> uatsheuat nenua utauassimisha mani. Tshek apu nita uitsheuat. Mishta-shatshieshu nenua ussimisha ne Atshen, tshek tshi kanauasseu. Mishta-shatshikushu min, ek<sup>u</sup> meshta-shuenimashit shiatshikut. Ekue tutamuat utauia umishtikuminu (tanite « nuta » ishinikateu).

— Nuta, shash nitshi tuten tshimishtikum, etat mani katshi tshimikauati nenua peik<sup>u</sup> minaikua.

« Ekue utinak », iteu itakanu, « nemenua nenu umishtikuminu. Apu tshi aiatshinamat uin nasht. Katshi kukauaniti nenua minaikua, ekue utinak », iteu itakanu, « ume ishpanitau nenu umishtikuminu, tatuau, nishtuau utitiku Atshena. Atshitau nenu mani umishtikum, eshakuma atshitau. Apu tshi tapapashtat nenu. »

Ekue minuat eshpish taht anite, minuat enutepanit mitshiminu ne ishkuueu.

— Nuta, iteu, ek<sup>u</sup> enutepanian minuat mitshim.

— Eshe, itiku.

« Ekue tshitutet mani », iteu itakanu, « nanitam ma uin papamuteu, kassinu kie nepatati tshekuannu, tshishat nenu petau. » Ekue eshpish shatshikut ek<sup>u</sup> nasht apu kushtat tshek ek<sup>u</sup> utauia (« nuta » tanite ishinikateu).

— Nitinish, iteu, ma, minuat kutak tshe takushinit !

« Eukuannua emuat », iteu itakanu, « nenua Atshena nepaiati muk<sup>u</sup> apu anite pitukaiat, ekute anite peminuet. Ek<sup>u</sup> katshi mitshishuti, mishta-uitshetu », iteu itakanu nenua utauia. Ek<sup>u</sup>

tshek itiku :

— Nitinish (katshi nishuau nipaianiti Atshena), eukuan pietutet kutak. Eukuan, nitinish, tshe eka tshi nipaik, apu tshika tshi nipaik.

Ketshessimikut ek<sup>u</sup>.

— Nitinish, itiku, apu tshika tshi nipaik, kie uin apu tshika tshi nipait. Muk<sup>u</sup> nika inikateiau tshetshi eka nita minuat Atshen natishk. Nika ui tuten tshetshi eka nita nutshikashk auen, ue Atshen tshe takushinit anutshish tshe tipishkanit.

Shash tshi tutamueu umishtikuminu. « Eukuannu nenu », iteu itakanu, « tekushinniti tapue. Netuapamat nutau. Eukuannu ma nenu miashikatuht », ekue itat itakanu. « Tepishkanit petakushuat metueutuht. Tshekat uapannu, eshk<sup>u</sup> tatuetaumat anite pessish e mashikatuht, ashikueuitutakat mani metueututau. Nutau mishta-mitshashkuannipan umishtikum, apu tatak nene », iteu itakanu. « Nutim anite kuaueuat mishtikua, anite miashikatuht, miam ne keuashkushtiki, eukuan eshinakutaht anite miashikatuht. Tshek, tshekat at uapannit, ek<sup>u</sup> katak<sup>u</sup> nete tetuetahk, ashikueuitutakat kie matueututakat. Tshek ekue eka petakushiht », iteu itakanu.

Ek<sup>u</sup> uiapannit tshetshipitshit, anite itishaukupan utauia.

— Ekute anite tshe ishpitshin, ekute anite innuat etaht pessish, itikupan.

Eukuan eitit. Mautanipani tshishat nenu umitshim, atikua tshishat nipaienipani ek<sup>u</sup> tapue tshatshipitshit ekue maniteut nete. Anite nishtuau katshi uitshit, ek<sup>u</sup> mianitekatuat nete innua, tepatshimushtuat : « Tshitshue nitshi shetshishin », iu itakanu. « Nasht kuetu nitau Atshen patukut, ekue ishinikatak 'nuta' ekue eka tapue nipait », iteu itakanu.

Eukuan eshkuiatshimikushit.

